

Gyɔn ɔwɔlɛ Nyɔsɛ

¹ Me, Wurubuaarɛ asonbo ɔbelɛnsɛ mɔ, ne n kya ɲmarasɛ ɔwɔlɛ baarɛ n kya sa fo, ɔkyii ɔbono Wurubuaarɛ gi lɛɛ fo yɛɛ fo' wɔra mɔ-sonbo mɔ. Fo-rɛ fo-biana ne n' kya sa gɛnen ɔwɔlɛ baarɛ.

N kya laarɛ fɛye-ilaa naa de Wurubuaarɛ gɛsintin ɔkalan mɔ so, ne i mɛɲ gyɛ me-nkon. Asa abono pɛwu mɛ nyi gɛsintin ɔkalan mɔ kee mɛ kya laarɛ fɛye-ilaa. ² I kya nyiile yɛɛ Wurubuaarɛ gɛsintin ɔkalan mɔ bo aye-rɛ fɛye dɔ ne ɔ laa kyena aye dɔ gɛkpa. ³ Aye-sɛ Wurubuaarɛ mɔ-rɛ mɔ-bi Yesu Kirisito mɛ' sa aye-rɛ fɛye so gɛwɔnsa dɛnsɛ de mɛ' su aye gitolon de mɛ' sa aye gisen yuuli kyu naa de gɛsintin de gɛlaarɛ' so.

Gɛsintin De Gɛlaarɛ' ɔkpa

⁴ I wɔra me ɔkon gikyɔ-gikyɔ yɛɛ nɛ wu fo-biana dɔ ako mɛ buu gɛsintin ɔkpa fɛɛ gɛnɔɔbono aye-sɛ Wurubuaarɛ gi ka yela sa aye mɔ. ⁵ Imɔso me-nyi dɛnsɛ, n kya kolɛ fo, yɛgɛ a' laarɛ abara. I mɛɲ gyɛ yɛɛ n kya ɲmarasɛ nbara pɔbɔɔ mi-i sa fo daa. Nbara mɔ gi gyɛ daa ndedaa nbono a wolaa a dɛ nmɔ lii gɛsɛ de gɛsɛ. ⁶ Gɛlaarɛ' gbaa-gbaa ne n gyɛ ibono a laa buu Wurubuaarɛ nbara ɔkpa. Nbara mɔ ne n gyɛ yɛɛ fɛ' buu gɛlaarɛ' ɔkpa fɛɛ gɛnɔɔbono a wolaa nu lii gɛsɛ de gɛsɛ mɔ.

⁷ Fɛ' kerɛ gɛnen ilaa idɛ so. I kya nyiile yɛɛ abono mɛ kya penɛ asa lii Wurubuaarɛ ilaa so mɔ mɛ naa mɛ naa gɛsinkpan so. Mɔmɔ ne n gyɛ abono mɛɲ kya kyule lɛɛ tɔgɛ yɛɛ Yesu ne n gyɛ Kirisito Wurubuaarɛ mɔ-bi, ne Wurubuaarɛ gi sun mɔ ba gɛsinkpan so baa bingiri nyamesɛ mɔ. Nengyene fɛ wu isa ɔbono ɔnan mɔ, mɔ ne

n gyɛ asa ɔpenɛbo mɔ. Mɔ kee ne n gyɛ Kirisito ɔkyobo mɔ. ⁸Fɛ' kerɛ fɛye-nyoro so dandan de ilaa ibono fɛ wɔra gɛsun nyɛ mɔ i mɛɲ sa i' lii fɛye-gibaa. Fɛ' nyɛ imɔ pɛwu so ntɛɛla. ⁹Nyamesɛ ɔbono ɔ tɔgɛ yɛɛ ɔ kya kpe ansi dɔ Wurubuaarɛ ilaa dɔ ne ɔ mɛɲ sii de Kirisito ilaa nyiileɛ mɔ, Wurubuaarɛ mɛɲ tɛ mɔ dɔ. ɔbono mɔ, o sii de Kirisito ilaa nyiileɛ mɔ, gɛnen kaasɛ ɔbono berɛ, aye-sɛ Wurubuaarɛ mɔ-rɛ mɔ-bi Kirisito mɛ tɛ mɔ dɔ.

¹⁰ Nengyene ɔko gi ba fɛye asɛ ne i mɛɲ gyɛ ilaa nyiileɛ idɛ ɔnan ne ɔ dɛ mɔ, fɛ mɛɲ sa fɛ' sɔɔ mɔ gisafo abɛɛ fɛ' faala mɔ. ¹¹ ɔbono ɔ kya faala gɛnen isa ɔbono ɔnan mɔ dɛ mɔ-nyoro ɔ wɔra kaasɛ mɔ-ilaa nyɛnyɛn giwɔra dɔ ne.

Afaala Laalalogɛ

¹² Nkana n san n bo ilaa gikyɔ ibono nan tɔgɛ sa fɛye. Nɛ kii kerɛ mɔ, mɛɲ kya laarɛ n' ɲmarasɛ imɔ ɔwɔlɛ dɔ bunge fɛye. Me-ansi a gyan daa yɛɛ nan ba nno baa wu fɛye de ansi de a' nyɛ tɔngɛ de abara. Imɔ ne nan yɛgɛ ne a laa nyɛ gyi ɔkon kpaa logɛ. ¹³ Nɛ sin gɛrɛ. Fo-daa ɔbono Wurubuaarɛ gi lɛɛ yɛɛ ɔ' wɔra mɔ-sonbo mɔ, mɔ-biana mɛ kya faala fo.

I gyɛ me,
Gyɔn

ḠḠḠḠ ḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ
AnyamesḠ ḠḠ ḠḠḠḠ ḠḠḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov
2021

4cc402b4-139a-5f33-9af9-fbf62307f663